

QUÆSTIO MEDICA,

*Quodlibetariis disputationibus manè discutienda in Scholis
Medicorum, die Jovis trigesimâ Decembris 1717.*

M. GUIDONE ERASMO EMMEREZ,
Doctore Medico, Præfide.

*An præstantior Medicus, qui in præscribendis Remediis
parcior?*

I.

MEDICINA Dei munus homini concessum, ut salubrius & diutissime vi-
vat: sed heu! quàm pauci inter homines divinæ istius artis legum (quæ
& ipsius sunt naturæ) adeo studiosi, ut in iis tanquam in anchorâ consistant.
Novit ars latrix & experitur quotidie tum corporis, tum animi functiones
melius multo perfici, atque firmiorem stare sanitatem, non naturalium re-
rum omnium mediocritate; hinc de iis omnibus abunde *utitur*, hinc corpora
non repleri, non cibo, potu vires opprimi vult Medicus, sed refici tantum,
verum homo licentiâ effrænis & exlex suæ, valetudini decoquit quotidie,
nec ad calcandam lethi viam expectat, ut senio & annis exhausto humido ex-
tenuetur corpus, vitalis calor extinguatur. Ocyus etiam mors corripere gra-
dum, ni communis omnium & optima mater natura è vegeabili, minera-
lium, animalium familiâ arti nostræ suppeditavisset cujuscumque virtutis præ-
sidia adversus morbos in quos voluptate, animi pathematis, omnis generis
immoderationibus, sed præcipuè gulâ, ultro præceps ruit se miser ille, nec sa-
tis culpandus homo. Multa sanè & quidem proficua remedia adversus quas-
libet aggritudines habet ars medendi magistra. Ex his sunt graviora alia, quæ in
usum vocavere hodierni nostri medici delicatiorum hominum palato indul-
gentes, alia quæ vetus ætas comprobavit, minus grata, virtute præstantiora;
sunt composita quædam, quædam simplicia. In utrisque mitiora, vehemen-
tiora. E simplicibus, quæ è natali solo virtuti adaugendæ accommodatiori cæ-
teris præferenda; composita non eò pluris facienda; quò illorum compositio-
nem ingrediuntur longè plura ex omni genere & familiâ; tot hæc ad artis
pompani nequaquam remediî efficacitatem majorem. Compositis securiora
simplicia, si modò infusâ decocta usurpentur, aut integra, & ut sunt;
minimè ad Magisteriorum, Elixiriorum, Extractorum, Resinaturnve formas
reducta. Ut ut sit his omnibus uti liceat, nihil moror, (dummodò nec teme-
rè nec timidè) sint etiam necessariæ aliquando auxiliorum vices, attamen
præstantior Medicus erit qui in præscribendis remediis parcior.

II.

TESTE Hippocrate ut in artibus bene multis artifex artifice præstat manu;
sic & in Medicinâ mente artifice præstat artifex. Præstantior, non ille est

qui & verborum abundantia, & remediorum numero atque multitudine famam apud Magnates populumve aucupari studet, verum qui tutius curat, (nam sanare non est Medici, sed Naturæ, Medici curare tantum.) Plura scitu necessaria Medico antequam corporum curationem suscipiat. Sciat oportet ex quibus corpus nostrum constituitur, & quæ sanitatem morbumve efficit possunt. Corpus nostrum constituunt Sanguis, Pituita, Bilis duplex, Flava nempe & Nigra. Hæc vera sunt corporis nostri principia quæ Medico sufficiunt, ut pote sensibilia; cum hæc inter se congruunt pro cuiusque temperamento, sanitas est: Ab his quatuor dolet etiam & ægrotat homo, ubi horum quicquam minori, majori ve copia fuerit, aut in corpore separatim, nec reliquis aliis temperatum. Revera ex humorum tum in quantitate, tum in qualitate vitiis morbi omnes, leviores, putridi, Acuti, Maligni, Chronici. Malignitas in morbis, major putredo. Chronici tales fiunt, quia initio aut non cogniti, aut neglecti; Morborum principiis obstandum, & tempore adhibendum remedium. Morbis potest aliquando mederi Natura sola; aliquando conatur quidem aliquid, at nimium oppressa, impedita, debilis vocat qui curet, non quemvis, non temerarium, cui, etiam si prosit nonnunquam, minus fidendum, in quo scilicet minus est rationis & consilii, imò sapientem vocat, & peritum Medicum qui morbi speciem, causas, magnitudinem rectius dijudicans, laborantis Naturæ conatus motusque distinguens apprimè, tutius curare possit, etenim tutò curate, est Naturam in agendo imitari, adjuvare. Hæc Naturæ imitatione, & curationis securitas, & præstantia Medici qui nec plura vel ejusdem, vel diversæ virtutis adhibebit remedia, ne inter illa, aliqua inutilia, inter hæc, alia aliis sint impedimento; nec idem (etsi proficuum) sæpius, ne novo & tumultuario imperu vis Naturæ inferatur. Cum in omni morbo, ægro, tante, remedio, insit singulare quid propter quod unum alteri convenit magis, pauca remedia administrat in curando præstantior Medicus, sed convenientiora cuique ægritudini, ægro, laboranti parti, ut inde tutior curatio. Hanc convenientiam nescit, cui notior est Natura; huic igitur noscendæ totus se dat optimus quisque & præstantior Medicus.

III.

INTIMUM Naturam inter & Medicinam commercium. Ambæ sibi mutuò dant auxilium ad opus commune, hominis sanitatem. Naturæ est opus inchoare, Medicinæ illam imitari; Medici quia in agendo Naturam sequuntur ducem huic toti sunt & unicè student. Apagè tamen! Calumniatores aut maligni, aut insulsi qui nos tanquam profanum numen habere Naturam & venerari garrunt. Discant illi quid Natura apud Medicos. Natura vel universalis est, vel particularis. Universalis communis omnium mater nihil aliud quam spiritalis aura, virtus verè divina per universum diffusa, disseminata, quæ ipso cuncta fuere; terra virentem herbam germinavit, arbores fructificæ factæ sunt, & in ipsis terræ visceribus mineralia, metalla, lapides concreverunt; quæ etiam nunc hodie, lege semel stabilitâ & immutabili, cuncta in suo esse & genere servantur servabunturque in posterum. Particularis Natura quæ ab universali manat tanquam rivus à fonte, à matre soboles, singulis rebus ita propria est, ut per eam unum maximè differat à quivis alio: hæc in homine vis est latens occulta, verèque agens, sed variè in unoquoque nostrum pro variâ principiorum ex quibus constamus mixtione; reipsâ pro diversâ illorum mixtione; hominum diversum temperamentum, natura diversa, (hæc duo unum sunt) quæ in his aut istis diversas propensiones habet, motus conatusve diversos molitur. Ejusmodi propensiones in homine, si ad malum, mutare, vincere, superare possunt Ratio & Religio (difficiliter tamen) & in hoc hominis virtus. Vim istam nesciunt quidem, sed sentiunt & ipsæ belluz: hanc autem in his ut in nobis fovent & ad actum promovent spiritus animales qui teverà existunt. In investigandâ Naturâ si nihil ultra comprehendimus, quid mirum! Cum Deus ipse, à quo Natura, incomprehensibilis. Deus in

operibus suis solum-modò mirabilis, nemo ejus consiliarius fuit, ipse solus omnia disposuit & ut voluit fecit. Natura communis ad singularis bonum arque conservationem attenta maximè, arti corporum curatrici subministravit præsidia adversus hostes insensissimos, morbos videlicet quoscumque, à quibus ex omni parte oppugnatur homo. Qui Medicus pariori manu utitur præsidii istis, tutius ægris auxiliatur.

. IV.

VERE probus & optimus Medicus non modò paucis, imò nullis quandoque remediis utitur, sed vocatus venit ad ægros quasi feriatu spectator; id quoties evenit, nec minorem scientiam testatur, nec minorem medendi peritiam, quin potiùs summam longà & sæpiùs reperitâ experientiâ atque etiam prudenti eventuum observatione acquisitam. Sanare, Naturæ opus. Adquid igitur remedia! Ubi hæc superior, sola potest opus explere. Si inutilia remedia, non idcirco tunc inutilis Medicus, cavebit ne quid peccetur in diatâ; nam ut diatâ conveniente, pariori, plerique morbi præcaveri possunt, sic faciliè curantur minimi: hæc quoque curantur vel levantur saltem alii quibus nequaquam profuerant alterantia varia, absorbentia, attenuantia, aut alia quæ fundunt aliterve agunt. Non danda remedia ubi morbo superior Natura, nec danda ubi nullus jam Medicinæ locus & victor Morbus ægrum jugulat: crimen esset in homicidii partem venire, non infamandum præsidium aliàs profuturum. Præstat anceps potiùs quàm nullum remedium experiri, illud verum, modò sit adhuc aliqua spes salutis; si nulla fuerit, jam non anceps remedium: illud dijudicare non cuiusvis hominis est (judicium enim difficile) sed sagacioris & peritioris Medici qui spem ex morbi essentiâ, magnitudine, & ex ægrotantis viribus depromit. Ars Medica tum se dedere debet Naturæ cum hæc illius opem poscit, at tunc etiam, ne Medicus pluribus remediis noceat plus quàm proderit. Non ipsum terreat symptomata quæ morbum consequi solent, v. g. in variolis delirium fugax, strictiones alvus. Ubi vel unum sæpiùs, vel plura adhibentur remedia, perinde est, difficilè, quin aliquando temerè, quia minùs opportunè, unde Natura offenditur, subvertitur, corpus læditur, vehementius movetur quod noxium. Optimus Medicus in præscribendis remediis parior, tutius multò & securius curat. Ille quid possit, quid recuset Natura attendit sedulò, nisi quò ducit movet, nec ultrà modum & opportunè semper (quod maximum est in curando) reverà ægrotantis salus non tam ex remedium numero ac diversitate pendet quàm ex opportunitate captandâ in medendo. Opportunitatem indicat natura; igitur cum Naturam potiùs sequatur Medicus in præscribendis remediis parior, nihil tentat temerè, nihil nisi cum faver occasio, inde tutius curat, ægro si non profit, nocet nunquam. Quinimò venit utilis Imitator, & Adjutor Naturæ in opere quod Prior ipsa suscepit, & maximè sui juris est.

V.

NATURAM esse morborum medicatricem nemo negaverit, quâ deficiente deficit Medicus. Imò jam ars omnis exhausta est & perit æger, sed ecce peritor ac potentior Natura ferè exanimem ab ipsâ morte vindicat & sola ad integram refert sanitatem. Frustrâ nonnunquam quæ diuretica dicta sunt adhibeas in hydropè qui superveniente diarrhoea sponte solvitur, & certè cathartica sunt vera diuretica. Alkalia volatilia, sudorifica, experiri periculosum nonnunquam, hæc quam parentis sui, ignis scilicet, incendiariam vim servant ad intima usque corporis ferunt, corpus universum calefaciunt, exsiccant, sudores promovent nunquam, ni priùs Natura vias referarit, aperuerit. Ad quid ergo ejusmodi remedia vel alia tenuente naturâ. Tota Medicina adjunctio, detractio: ubi in tenuiori corpore adjiciendum aliquid, non medicamentis, sed diatâ convenienti aggrediendum & complendum opus, quod difficillimum; nam qui in tenui delinquant ob id læduntur magis. In plenitudine detrahendum, atque tunc medicamentis quidem opus, at paucis. Plethoræ

se. ad vas seu ad vires sufficiat ut plurimum venasectio, cui palma debetur in
medendo, cujus modum & tempus ex ipsa plenitudine & agri viribus aestima-
bit prudens Medicus & in arte nostrâ versatus, sed quæ rarior erit, si statim
incipiente morbo, nec longioribus intervallis celebretur. Cacoehymia debetur
præterea purgatio tum *adru*, tum *âra*, verum rarioris etiam necessitatis erit,
si Natura & Ars adunatis viribus agant ad exuperantem & peccantem humo-
rem excernendum; rotus enim vel unicâ vice, etiam initio & primo quoque
tempore evacuabitur, si exhibeantur purgantia dum humor jam concitatus
est, cum turget & illum mover ac ducit Natura; vel aliâs partitis vicibus, at
non toties repetitis, si corpus bene præparatum & fluxile fuerit, si humorem à
Natura coctione fractum, marurum, & inde factum obsequio facilem, atque
quasi spontè decidentem pharmaca propellant. Cathartica, ut & alia remedia
quibus uri convenit aliquando profunt data tempore, alieno nocent; atque ut
viator semel è viâ devius eò aberrat magis, quò magis progreditur, sic Medicus
eò magis nocet quò plura præscribit remedia, quia pleraque non opportune.
Opportunitas adhibendi remedii seu occasio præceps & rara, raro igitur ad-
hibeantur remedia. Si frequentius, exacerbabuntur potius morbi, conru-
macesve fient, inde patietur natura, solidorum robur frangetur, liquida præve-
permiscebuntur, turbabuntur ut & spiritus, à quibus potissimum functiones
omnes, calor & vita.

Ergo præstantior Medicus qui in præscribendis Remediis parcior.

Domini Doctores disputaturi.

M. Joannes Bessé, Medi-
cus Domus Regiæ.

M. Joannes-Baptista Tho-
mas Martinencq, Chi-
rurgia Professor.

M. Franciscus Afforty,
antiquus Facultatis
Decanus.

M. Antonius de Jussieu,
Regia Scientiarum Aca-
demia & Botanices in
Horto Regio Parisiensi
Professor.

M. Joannes Henricus Im-
bert, è Regiâ Scientia-
rum Academiâ.

M. Germanus Preaux,
Professor Regius.

M. Joannes Baptista Sil-
va, Serenissimi Ducis
Borbonii Medicus ordi-
narius.

M. Franciscus Pouffe,
Scholarum Professor.

M. Joannes Cordelle.

Proponebat Parisiis LUDOVICUS DE SANTEUL,
Parisiinus, Baccalaureus Medicus, A. R. S. H. 1718.
à sexta ad meridiem.